



**Sumáriu Kazu
Tribunál Distritál Oekusi
Novembru 2021**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 14

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	10
Artigu 154 Kódigu Penál (KP)	Maus-tratus ba kónjuje	1
Artigu 177 no 176 KP	Abuzu seksuál ba menór no pornografia infantíl	1
Artigu 145 KP	Ofensa ba integridade física simples	1
Artigu 189 KP	Instigasaun ba krime	1
Totál		14

2. Totál desizaun ne'ebé JSMP monitoriza : 9

Tipu desizaun	Artigu	Númeru
Pena prizaun	Artigu 66 KP	1
Suspensaun ba prizaun nia ezekusaun	Artigu 68 KP	4
Pena multa	Artigu 67 KP	1
Admoestasaun	Artigu 82 KP	2
Omologa dezisténsia keixa		1
Totál		9

3. Totál kazu sira ne'ebé kontinua prosesu tuir JSMP nia monitorizasaun : 5

4. Totál kazu sira ne'ebé tribunál adia bazeia ba monitorizasaun: 0

B. Deskripsaun sumáriu julgamentu ba desizaun kazu sira

1. Krime maus-tratus ba kónjuje ho natureza violénsia doméstika

Nú. Prosesu : 0025/19.OEOSL
Kompozisaun Tribunál : Koletivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 3 fulan 6

Iha 09 Novembru 2021, Tribunál Distritál Oekusi prezide leitura akordaun ba krime maus-tratus ba kónjuje ho natureza violénsia doméstika ne'ebé envolve arguidu SC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 15 Novembru 2019, maizumenus iha oras tuku 08:00 dadeer, arguidu kaer metin lezada nia liman kabun parte loos ho maka'as no rasta lezada monu ba rai rezulta lezada nia ain fuan bo'ot parte loos hetan kanek no moras, lezada hader atu halai arguidu lori fatuk tuda dala ida iha lezada nia liman parte loos, rezulta lezada nia liman bubu, metan no moras. Kazu ne'e aneksa hamutuk ho relatóriu médiku husi Ospital Referál Oekusi no fotografia husi aktu violénsia ne'e hasai husi polisia.

Prokuradór akuza arguidu kontra artigu 154 KP kona-ba krime maus-tratus ba kónjuje ho moldura penál tinan 2 to'o tinan 6 prizaun no ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene tuda lori fatuk no rasta ema seluk nia isin hanesan ne'e bele prejudika ninia saúde. Depoisde akontesimentu arguidu arrende nia hahalok no arguidu ho lezada seidak dame malu tanba depoisde akontesimentu ne'e lezada mak sai husi sira nia uma ba hela hamutuk fali ho nia inan/aman. Arguidu hela ho sira nia oan na'in tolu no lezada hela ho sira nia oan na'in ida. Arguidu ho lezada hola malu iha tinan 2008 no iha tinan 2019, arguidu hola tan nia feen ki'ik. Arguidu serbisu hanesan toos na'in laiha rendimentu fixu kada fulan no promete sei larepete nia hahalok ne'e iha futuro.

Alende ne'e lezada kontinua konfirma faktu hotu iha akuzasaun no deklarata katak antes ne'e arguidu sempre baku lezada no sira mai hatan ona iha tribunál tanba arguidu hakarak atu hola tan feen kiik. Lezada haktuir tan katak lakohi dame malu no fila fali ba sira nia uma tanba depoisde akontesimentu to'o agora arguidu moris hamutuk fali ona ho nia feen kiik iha uma. Lezada konfirma katak arguidu hela ho sira nia oan na'in tolu no lezada hela ho sira nia oan na'in ida.

Alegasaun finál

Prokuradór intende katak deklarasaun lezada no pozisaun arguidu ne'e konfirma duni faktu sira iha akuzasaun. Prokuradór intende katak arguidu halo agresaun fízika bebeik hasoru lezada tanba arguidu antes ne'e iha ona intensaun ka planu atu hola tan feen ki'ik, tanba ne'e prokuradór laiha duvida ba faktu sira nomós ba arguidu ninia intensaun refere no husu tribunál atu aplika pena prizaun efetiva tinan 4 tanba antes ne'e mós arguidu komete ona krime no mai hatan ona iha tribunál no hetan ona pena suspensaun maibé arguidu sei nafatin prátika ninia hahalok sira hasoru ninia feen.

Enkuantu defeza haktuir katak arguidu konfesa integralmente ba faktu sira iha akuzasaun no depoisde akontesimentu arguidu arrende ona nia hahalok, seidak diak malu tanba arguidu ho lezada hela keta-ketak, arguidu serbisu hanesan toos na'in laiha rendimentu fixu kada fulan, iha oan na'in haat maibé arguidu hela ho sira nia oan na'in tolu no lezada hela ho sira nia oan na'in ida, arguidu mós promete sei larepete hikas nia hahalok ne'e iha futuro no arguidu mak iha responsabilidade ba ninia família. Nune'e defeza solisíta ba tribunál atu aplika pena ne'ebé adekua ba arguidu tuir ninia sala.

Desizaun

Depoisde avalia faktu hotu, tribunál prova katak kaer metin lezada nia liman kabun parte loos ho maka'as no rasta lezada monu ba rai rezulta lezada nia ain fuan bo'ot parte loos hetan kanek no moras, lezada hader atu halai arguidu lori fatuk tuda dala ida iha lezada nia liman parte loos, rezulta lezada nia liman bubu, metan no moras.

Bazeia ba faktu provadu hirak ne'e no tetu mós ho sirkunstánsia atenuante sira ne'ebé haleu krime ne'e. Nune'e tribunál konklui prosesu ne'e no kondena arguidu ho pena prizaun tinan tolu fulan neen.

2. Krime ofensa ba integridade fízika simples ho natureza violénsia doméstika

Nú. Prosesu	: 0008/21.OEBCN
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena admoestasaun

Iha 15 Novembru 2021, Tribunál Distritál Oekusi prezide leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve arguidu GGMC hasoru nia feen ATC, iha Distritu Oekusi.

Akuzasaun Prokuradór

Prokuradór akuza katak iha 09 Juñu 2021, maizumenu iha oras tuku 22:00 kalan, arguidu basa dala ida iha lezada nia hasan parte karuk rabat hoibun rezulta lezada sofre moras. Antes agresaun ne'e, arguidu ho lezada diskute malu tanba kompañia atrazu halo pagamentu ba lezada, nune'e mosu agresaun hirak ne'e. Kazu ne'e aneksu hamutuk ho relatóriu médiku husi Sentru Saúde Baocnana no fotografia sira kona-ba violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene halo agresaun fízika hanesan ne'e ladiak no arrepende nia hahalok. Depoisde akontesementu to'o agora arguidu lahalo ona agresaun fízika hasoru lezada no promete katak sei larepete hikas hahalok hanesan iha futuru. Arguidu haktuir tan katak serbisu hanesan funsionariu iha kompañia Telemor ho rendimentu kada fulan US\$300.00, oan na'in rua, dame malu ona no arguidu foin primeiravés halo krime no mai hatan iha tribunál.

Prokuradór husu atu presinde lezada nia deklarasaun tanba iha produsaun ba prova arguidu rasik konfesa ona faktu hotu integralmenete no husi parte defeza laiha opozisaun. Nune'e tribunál imediatamente presinde lezada ninia deklarasaun.

Alegasaun finál

Prokuradór konsidera arguidu nia hahalok ne'e provadu tuir faktu sira ne'ebé hakerek ona iha akuzasaun no arguidu nia hahalok ne'e prenze duni elementu krime ofensa ba integridade fízika simples ho natureza violénsia doméstika. Prokuradór mós hanoin katak laiha duvida ba faktu sira tanba iha produsaun ba prova arguidu rasik konfesa faktu sira hotu iha akuzasaun. Prokuradór haktuir tan katak kazu laen baku feen akontese dalabarak kompara ho krime sira seluk. Tanba ne'e, prokuradór husu ba tribunál atu aplika pena ne'ebé hakerek ona iha artigu 145 KP.

Entretantu defeza intende katak iha produsaun ba prova arguidu rasik iha kolaborasaun diak ho tribunál hodi konfesa faktu hotu iha akuzasaun sein rezerva. Arguidu mós iha produsaun ba prova rekoñese katak hahalok hanesan ne'e ladiak no arrepende nia hahalok, depoisde akontesementu to'o agora arguidu lahalo ona agresaun fízika hasoru lezada, promete katak sei larepete hikas nia hahalok hanesan ne'e iha futuru. Lezada ho arguidu dame malu ona, serbisu hanesan funsionariu iha kompañia telemor ho rendimentu kada fulan US\$300.00, oan na'in rua, foin primeiravés mai iha tribunál. Tanba ne'e, defeza husu ba tribunál atu aplika pena ne'ebé adekudu ba arguidu tuir nia sala.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte karuk rabat hoibun rezulta lezada sofre moras.

Bazeia ba faktu provasdu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena admoestasaun.

3. Krime ofensa ba integridade fízika simples

Nú. Prosesu : 0062/21.OEPMK

Kompozisaun Tribunál : Singulár

Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Omologa dezisténsia keixa

Iha 08 Novembru 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Jaime Hornai, Deonizio Hornai ho Januariu Alves Soares hasoru lezadu Cornelio Mesquita, iha Aldeia Usapibela, Suku Lalisuc, Sub-distritu Pante-makasar, iha Distritu Oekusi.

Akuzasaun Prokuradór

Prokuradór akuza katak iha 02 Jullu 2021, iha oras tuku 01:00 madrugada, arguidu Jaime hamrik iha estrada ninin ne'ebé nakukun hela hodi dudu lezadu, nune'e lezadu husu ba arguidu nune'e "*nusa dudu hau*" arguidu hatan lezadu katak "*be ó nusa*". Ho nune'e arguidu Jaime tuku dala ida iha lezadu nia kotuk laran, tuku dala rua iha lezadu nia knosen parte karuk, tuku dala rua iha lezadu nia hirus matan no tuku dala ida iha lezadu nia ulun rezulta lezadu sofre moras. Hafoin arguidu Deonizio tuku dala ida iha lezadu nia hasan parte karuk rezulta bubu no metan no arguidu Januariu tuku dala ida iha lezadu nia reen-toos kauza kanek kois, bubu, metan no moras. Motivu husi akontesimentu ne'e tanba arguidu sira deskonfia lezadu ho nia aman buan. Kazu ne'e aneksa hamutuk ho relatóriu médiku husi Ospital Referal Oekusi no fotografia husi polisia kona-ba rezultadu violénsia sira ne'e.

Prokuradór akuza arguidu sira kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezadu.

Iha prosesu konsiliaun ne'e, lezadu hakarak dame malu ho arguidu sira sein kondisaun maibé lezadu husu atu la repete hikas hahalok ne'e iha futuru. Alende ne'e, arguidu sira mós konkorda ho pedidu lezadu nian no deklara katak arrepende nia hahalok no promete sei la repete tan hahalok hanesan iha futuru, nune'e lezadu husu ba tribunál atu deziste tiha ninia-keixa hasoru arguidu perante iha tribunál nia oin.

Alegasaun finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa pedidu dezisténsia keixa ne'e.

4. Krime ofensa ba integridade fízika simples ho natureza violénsia doméstika

Nú. Prosesu : 0010/21.OEPSB
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1 fulan 6

Iha 23 Novembru 2021, Tribunál Distritál Oekusi prezide leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu BTC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 14 Feveireiru 2021, maizumenus iha oras tuku 13:00 meiodia, arguidu tebe dala ida iha lezada nia ibun parte kraik, tuku dala ida iha reen-toos no tuku tan dala ida iha lezada nia matan parte karuk. Antes agresau ne'e, arguidu ho lezada diskute malu kona-ba arguidu fó hatais sira nia oan nia roupa laloos. Konsekuensia husi arguidu nia agresau fízika ne'e rezulta lezada sofre moras. kazu ne'e aneksa hamutuk ho relatóriu médiku husi Sentru Saúde Pasabe no fotografia hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun, arrepende nia hahalok, foin primeiravés mai hatan iha tribunál no promete sei la repete tan hahalok hanesan iha futuru, serbisu hanesan toos na'in laiha rendimentu fixu kada fulan, iha oan feto ida, depoisde akontesementu to'o agora arguidu lahalo ona krime hasoru lezada no arguidu ho lezada dame malu ona no kontinua moris hamutuk nafatin iha uma ida.

Alende ne'e lezada kontinua konfirma faktu sira hotu iha akuzasaun no deklara katak depoisde akontesementu to'o agora arguidu lahalo ona agresau fízika hasoru lezada no arguidu foin primeiravés komete krime hasoru lezada.

Alegasaun finál

Prokuradór husu ba tribunál atu aplika pena prizaun tinan ida suspende ba tinan ida tanba prokurador konsidera arguidu nia hahalok ne'e prene duni elementu krime ofensa ba integridade fízika simples ho natureza violénsia doméstika.

Entretantu defeza husu ba tribunál atu aplika pena ne'ebé kmaan ho konsiderasaun sira katak durante iha produsaun ba prova arguidu konfesa, arrepende nia hahalok, promete sei la repete hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, serbisu hanesan toos na'in laiha rendimentu fixu kada fulan, iha oan feto ida, depoisde akontesementu to'o agora arguidu lahalo ona krime

hasoru lezada no arguidu ho lezada dame malu ona no kontinua moris hamutuk nafatin iha uma ida.

Desizaun

Depoisde avalia faktu hotu, tribunál prova katak arguidu tebe dala ida iha lezada nia ibun parte kraik, tuku dala ida iha reen-toos no tuku tan dala ida iha lezada nia matan parte karuk.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no promete sei la repete tan hahalok hanesan iha futuro, nune'e tribunál konklui prosesu no kondena arguidu ho pena prizaun tinan ida suspende ba tinan ida fulan neen.

5. Krime ofensa ba integridade física simples ho natureza violência doméstica

Nú. Prosesu : 0028/20.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena multa US\$100.00

Iha 15 Novembru 2021, Tribunál Distritál Oekusi prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu GJS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 07 Novembru 2020, maizumenus iha oras tuku 19:00 kalan, arguidu basa dala rua iha lezada nia ulun rezulta lezada sofre moras. Antes agresaun ne'e, arguidu ho lezada diskute malu kona-ba bainhira arguidu fila husi mate uma ho kondisaun lanu, haruka lezada atu halo mie sedaap ba arguidu han maibé lezada lakohi halo, nune'e mosu agresaun hirak ne'e. Kazu ne'e aneksa hamutuk ho relatóriu médiku husi Pradet no fotografia hasai husi polísia.

Prokuradór akuza arguidu kontra artigo 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigo 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun, arrepende nia hahalok no promete sei la repete ninia hahalok ne'e hasoru lezada ka ema seluk iha futuro, foin primeiravés halo krime no mai hatan iha tribunál, serbisu funsionariu iha saude ho rendimentu kada fulan US\$205.00, iha oan mane ida, depoisde akontesementu to'o agora arguidu lahalo ona krime hasoru lezada no arguidu ho lezada dame malu ona no moris hamutuk iha uma ida hanesan feen ho laen.

Alende ne'e lezada kontinua konfirma faktu sira hotu iha akuzasaun no deklarata katak depoisde akontesementu ate agora arguidu lahalo ona agresan fízika hasoru lezada no arguidu foin primeiravés komete krime hasoru lezada

Alegasaun finál

Prokuradór konsidera arguidu nia hahalok ne'e prenze duni elementu krime ofensa ba integridade fízika simples ho natureza violénsia doméstika tanba iha produsaun ba prova arguidu rasik konfirma faktu hotu iha akuzasaun. Prokuradór hanoin katak kazu laen baku feen dala barak ona tribunál halo julgamentu to'o balun ba ona iha prizaun maibé kazu ne'e kontinua barak nafatin. Tanba ne'e prokuradór husu ba tribunál atu aplika pena multa US\$90.00.

Entretantu defeza akresenta katak durante iha produsaun ba prova arguidu rasik iha kolaborasaun diak ho tribunál hodi konfesa faktu hotu iha akuzasaun, arrepende nia hahalok, promete ba tribunál sei la repete ninia hahalok ne'e hasoru lezada ka ema seluk iha futuru, serbisu hanesan funsionariu iha saude ho rendimentu kada fulan US\$205.00, foin primeiravés halo krime no mai hatan iha tribunál, iha oan mane ida, depoisde akontesementu to'o agora arguidu lahalo ona krime hasoru lezada no arguidu ho lezada dame malu ona no moris hamutuk iha uma ida hanesan feen ho laen. Tanba ne'e, defeza solisita ba tribunál atu aplika pena ne'ebé mais adekua ba arguidu tuir nia sala.

Desizaun

Depoisde avali faktu hotu, tribunál prova katak arguidu basa dala rua iha lezada nia ulun rezulta lezada sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés komete krime no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena multa US\$100.00 ne'ebé arguidu sei selu US\$1.00 kada loraun durante loraun 100. Tribunál mós fiksa pena alternativa durante loraun 66 iha prizaun, bainhira arguidu lakumpri pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu	: 0162/20.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena prizaun tinan 1 suspende ba tinan 1

Iha 15 Novembru 2021, Tribunál Distritál Oekusi preside leitura sentensa ba krime ofensa ba integridade fízika simples ho natureza violénsia doméstika ne'ebé envolve husi arguidu AT hasoru nia feen GMS. Iha Distritu Oekusi.

Akuzasaun Prokuradór

Prokuradór akuza katak iha 09 Novembru 2020, maizumenus iha oras tuku 18:00 kalan, arguidu tebe dala ida iha lezada nia kabun rezulta lezada sofre moras no monu kedas ba rai no arguidu kontinua basa dala ida iha lezada nia hasan parte karuk. Antes agresaun ne'e, arguidu ho lezada diskute malu kona-ba antes ne'e lezada diskute malu ho arguidu nia inan. Kazu ne'e aneksa hamutuk ho relatóriu médiku husi Sentru Saúde Baocnana no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa parsialmente ba faktu sira iha akuzasaun katak arguidu basa de'it lezada maibé latebe lezada, arguidu arrepende nia hahalok, promete ba tribunál sei la repete ninia hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, serbisu hanesan toos nain laiha rendimentu fixu kada fulan, iha oan feto ida, depoisde akontesementu to'o agora arguidu lahalo ona krime hasoru lezada no arguidu ho lezada dame malu ona no moris hamutuk iha uma ida hanesan feen ho laen.

Entretantu lezada kontinua konfirma faktu sira hotu iha akuzasaun no deklara katak depoisde akontesementu lezada ho arguidu dame malu kedas to'o agora kontinua moris hamutuk nafatin iha uma ida.

Alegasaun finál

Prokuradór konsidera arguidu nia hahalok ne'e preense duni elementu krime ofensa ba integridade fízika simples ho natureza violénsia doméstika tanba iha produsaun ba prova arguidu rasik konfirma faktu balun iha akuzasaun katak basa lezada dala ida de'it. Tanba ne'e prokuradór ho respeitu promove ba tribunál atu aplika pena ne'ebé hakerek ona iha artigu 145 KP atu iha futuru arguidu labele repete hikas nia hahalok no ema seluk labele halo tuir.

Entretantu defeza akresenta katak emprensiu durante iha produsaun ba prova arguidu konfesa faktu parsialmente, iha kolaborasaun diak ho tribunál, arrepende ona ba nia hahalok, promete ba tribunál sei la repete ninia hahalok ne'e hasoru lezada ka ema seluk iha futuru, serbisu hanesan toos nain laiha rendimentu fixu kada fulan, foin primeiravés halo krime no mai hatan iha tribunál, iha oan feto ida, dame malu ona. Tanba ne'e, defeza solisita ba tribunál atu aplika pena admoestasaun tanba arguidu konfirma basa lezada dala ida de'it.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kabun rezulta lezada sofre moras no monu kedas ba rai no arguidu kontinua basa dala ida iha lezada nia hasan parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende nia hahalok, di'ak malu ona ho lezada no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

7. Krime ofensa ba integridade física simples ho natureza violência doméstica

Nú. Prosesu : 0015/21.OEPSB
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena admoestasaun

Iha 30 Novembru 2021, Tribunál Distritál Oekusi prezide leitura sentensa ba kazu ofensa ba integridade física simples ho natureza violência doméstica ne'ebé envolve arguidu JM hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 27 Abril 2021, maizumenus iha oras tuku 19:00 kalan, arguidu basa dala ida iha lezada nia hasan parte karuk rezulta lezada sofre moras. Antes agresaun ne'e, arguidu ho lezada diskute malu kona-ba lezada ba ajuda nia inan/aman hamoos haree duut no fila ba uma tarde. Kazu ne'e aneksu hamutuk ho relatóriu médiku husi Sentru Saúde Pasabe no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene halo agresaun física hanesan ne'e ladiak no arrepende nia hahalok. Depoisde akontesementu to'o agora arguidu lahalo ona agresaun física hasoru lezada no promete katak sei larepete hikis nia hahalok hanesan ne'e iha futuru. Arguidu haktuir tan katak serbisu hanesan toos na'in laiha rendimentu fixu kada fulan, oan na'in ida, dame malu ona no arguidu foin primeiravés halo krime no mai hatan iha tribunál.

Prokuradór husu atu presinde lezada nia deklarasaun tanba iha produsaun ba prova arguidu rasik konfesa ona faktu integralmente no husi parte defeza laiha opsau. Nune'e tribunál presinde lezada ninia deklarasaun.

Alegasaun finál

Prokuradór konsidera katak faktu ne'ebé hakerek ona iha akuzasaun ne'e provadu, nune'e prokuradór konsidera arguidu nia hahalok ne'e preense duni elementu krime ofensa ba integridade física simples ho natureza violência doméstica. Tanba ne'e, prokuradór husu ba tribunál atu aplika pena ne'ebé hakerek ona iha artigu 145 KP.

Entretantu defeza intende katak iha produsaun ba prova arguidu rasik iha kolaborasaun diak hodi konfesa faktu hotu iha akuzasaun. Iha produsaun ba prova mós arguidu rekoñese katak hahalok hanesan ne'e ladiak no arrepende ona ba nia hahalok, promete katak sei larepete hikas nia hahalok hanesan ne'e iha futuro. Lezada ho arguidu dame malu ona, serbisu hanesan toos na'in laiha rendimentu fixu kada fulan, oan na'in ida, foin primeiravés mai iha tribunál. Tanba ne'e, defeza husu ba tribunál atu aplika pena admoestasaun maibé karik tribunál iha hanoin seluk perte defeza husu justisa tuir arguidu nia sala.

Desizaun

Depoisde avalia faktu hotu tribunál prova katak arguidu basa dala ida iha lezada nia hasan parte karuk rezulta lezada sofre moras.

Bazeia ba faktu provadu hirak ne'e hotu no tetu mós ba sirkunstansia atenuante arguidu konfesa, arrepende nia hahalok no promete sei la repete tan hahalok hanesan iha futuro no di'ak malu ona ho lezada, nune'e tribunál konklui prosesu ne'e no kondena arguidu ho pena admoestasaun.

8. Krime ofensa ba integridade física simples ho natureza violéncia doméstika

Nú. Prosesu : 0001/21.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 15 Novembru 2021, Tribunál Distritál Oekusi prezide leitura sentensa ba krime ofensa ba integridade física simples ho natureza violéncia doméstika ne'ebé envolve arguidu DNS hasoru nia feen AC. Iha Distritu Oekusi.

Akuzasaun Prokuradór

Prokuradór akuza katak iha 03 Janeiro 2021, maizumenus iha oras tuku 11:00 dadeer, arguidu tuku dala ida iha lezada nia kanuruk, arguidu kontinua tebe dala ida iha lezada nia kotuk laran kauza lezada sofre moras. Antes agresaun ne'e, arguidu ho lezada diskute malu kona-ba bainhira arguidu fila ba uma ho kondisaun lanu. Kazu ne'e aneksa hamutuk ho relatóriu médiku husi PRADET no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun katak arguidu tuku no tebe duni lezada. Arguidu akresenta liután katak tuku no tebe lezada hanesan ne'e ladiak no arrepende nia hahalok, foin primeiravés halo krime no mai hatan iha tribunál, depoisde akontesementu arguidu ho lezada dame malu arguidu ho lezada moris hamutuk iha oan

na'in tolu no arguidu serbisu hanesan motorista ho rendimentu kada fulan US\$110.00 no promote sei larepete hikas nia hahalok hasoru nia feen ka ema seluk.

Entretantu lezada kontinua konfirma faktu sira hotu iha akuzasaun no deklarata katak depoisde akontesementu ne'e arguidu ho lezada dame malu kedas to'o agora arguidu lahalo ona agresaun fizika hasoru lezada.

Alegasaun final

Prokurador konsidera arguidu nia hahalok ne'e provadu tuir faktu ne'ebé hakerek ona iha akuzasaun no preste duni elementu krime ofensa ba integridade fizika simples ho natureza violensia domestika. Prokurador haktuir tan katak krime sira ho natureza violensia domestika barak liu akontese iha Regiaun Oekusi kompara ho munisipiu sira seluk. Tanba ne'e prokurador husu ba tribunál atu aplika pena ne'ebé hakerek ona iha artigu 145 KP atu iha futuru arguidu labele repete hikas nia hahalok hasoru lezada.

Entretantu husu ba tribunál atu aplika pena ne'ebé adekua ho konsiderasaun katak durante iha produsaun ba prova arguidu konfesa faktu integralmente, kolabora diak ho tribunál, arrepende nia hahalok, promete ba tribunál sei la repete ninia hahalok ne'e hasoru lezada ka ema seluk iha futuru, serbisu hanesan motorista ho rendimentu kada fulan US\$110.00, foin primeiravés halo krime mai hatan iha tribunál, iha oan nain tolu, dame malu ona no arguidu mak iha responsabilidade maximu ba iha lezada ho nia oan sira.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kanuruk, arguidu kontinua tebe dala ida iha lezada nia kotuk laran kauza lezada sofre moras.

Bazeia ba faktu provadu hirak ne'e no tetu mós ho sirkunstansia atenuante sira hanesan arguidu konfesa arrepende nia hahalok, foin primeravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

9. Krime ofensa ba integridade fizika simples ho natureza violensia domestika

Nú. Prosesu	: 0013/21.OEPSB
Kompozisaun Tribunál	: Singulár
Juis	: Dr. Hugo da Cruz Pui
Prokurador	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 1 suspende ba tinan 1

Iha 30 Novembru 2021, Tribunál Distritál Oekusi prezide leitura sentensa ba kazu ofensa ba integridade fizika simples ho natureza violensia domestika ne'ebé envolve arguidu AS hasoru nia feen, iha Distritu Oekusi.

Akuzasaun Prokurador

Prokuradór akuza katak iha 21 Abril 2021, maizumenus iha oras tuku 19:00 kalan, arguidu tebe dala ida iha lezada nia kakorok parte loos, rakut lezada nia fu'uk no baku ba iha parede rezulta lezada monu ba rai, arguidu kontinua sama lezada nia liman kabun, rezulta kanek kois, metan, bubu no moras. Antes agresaun ne'e, arguidu ho lezada diskute malu kona-ba lezada deskonfia arguidu amante (*selingkuh*) ho feto seluk. Kazu ne'e aneksa hamutuk ho relatóriu médiku husi Sentru Saude Pasabe no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun no hatene halo agresaun fízika hanesan ne'e ladiak no arrepende nia hahalok. Arguidu akresenta liután katak foin primeiravés halo krime no mai hatan iha tribunál, promete ba tribunál sei la repete ninia hahalok ne'e hasoru lezada ka ema seluk iha futuru, serbisu hanesan toos na'in laiha rendimentu fixu kada fulan, iha oan na'in rua, depoisde akontesementu to'o agora arguidu lahalo ona krime hasoru lezada no arguidu ho lezada dame malu ona no moris hamutuk nafatin iha uma ida hanesan feen ho laen.

Tanba iha produsaun ba prova arguidu rasik konfesa no prokuradór husu ba tribunál atu presinde lezada nia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu nia hahalok ne'e provadu tanba deklarasaun arguidu konfirma faktu hotu ne'ebé hakerek ona iha akuzasaun. Prokurador mós hanoin katak hahalok arguidu prenze duni elementu krime ofensa ba integridade fízika simples ho natureza violénsia doméstika, tanba ne'e prokuradór husu ba tribunál atu aplika pena ne'ebé hakerek ona iha artigu 145 KP.

Entretantu defeza akresenta katak iha produsaun ba prova arguidu konfesa faktu integralmente, iha kolaborasaun diak ho tribunál, arrepende nia hahalok, promete ba tribunál sei la repete ninia hahalok ne'e hasoru lezada, serbisu hanesan toos nain laiha rendimentu fixu kada fulan, foin primeiravés halo krime mai hatan iha tribunál, iha oan na'in rua, dame malu ona moris hamutuk nafatin iha uma ida hanesan feen ho laen. Tanba ne'e, defeza solisíta ba tribunál atu aplika pena adekuaudu atu arguidu bele nafatin kontinua haree no tau matan ba ninia família.

Desizaun

Depoisde avalia faktu, tribunál prova katak arguidu tebe dala ida iha lezada nia kakorok parte loos, rakut lezada nia fu'uk no baku ba iha parede rezulta lezada monu ba rai, arguidu kontinua sama lezada nia liman kabun, rezulta kanek kois, metan, bubu no moras.

Bazeia ba faktu provadu hirak sira ne'e no tetu mós ho sirkunstansia atenuante sira hanesan arguidu konfesa, arrepende nia hahalok, di'ak malu ona ho lezada no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl